

21. Splendebant ambo, ignem sursum flagrantem dextrorsum circumambulantes, sicut dies et nox conjunctim in *Meruis* planitiebus versantes.

22. Sponsa, pulchris clunibus prædita, atque perdicis exsultantis oculis, a magistro illo BRAHMANI simili jussa, pudenter grana in ignem injecit.

23. Prodiitque ex igne fumus purus, butyri, *samis* surculorum et farris odorem spargens, qui, vertice suo in humeris illius recumbens, per aliquot tempus apparebat veluti flos, aures ejus ornans.

24. Fumo sacro in faciem puellæ acto, oculi illius collyrii liquore suffundebantur, semiusta granorum germina annulorum instar in aure ejus considerabant, atque genæ ejus fuscabantur.

25. Deinde ambo, puella et juvenis, in sella aurea sedentes, a patribus familias, a rege cognato et a feminis nuptis justo ordine granis humidis conspergebantur.

26. Ita cum rex, BHOJARUM familiæ lux, sororis matrimonium perfecisset, felicitate eximia præditus, ministros singulis regibus justos honores tribuere jussit.

27. Illi, iram suam sub gaudii signis occultantes, lacuum tranquillorum instar in quibus crocodili latent, regem salvere jusserunt atque abierunt, sub muneribus oblatis quasi reddentes ei honores acceptos.

28. Reges, postquam pactionem fecerant de conatu suo perficiendo, feminam illam delicatam, tempore opportuno adipiscendam, rapturi, AJÆ viam obsidentes stabant.

29. *Krathakaisikorum* dominus etiam, sororis matrimonio absoluto, opibus facultati suæ congruis in dotem datis, RAGHUIDAM dimisit ipseque secutus est.

30. Trinoctium cum AJA, per tres mundos celebrato, in itinere commoratus, *Kundinæ* urbis dominus ab illo reversus est, veluti luna sub *Parvanis* finem solem relinquit.

31. Jam olim hi reges RAGHUI, *Kosalæ* principi, ob opes unicuique eorum ereptas succensuerant; ideo nunc congregati filium illius puellam eximiam nactum esse haud æquo animo ferebant.

32. Ei, BHOJÆ sororem secum abducenti, superba regum caterva viam